

**AWIG-AWIG
DESA PAKRAMAN PETULU**



**DESA PETULU
KECAMATAN UBUD
KABUPATEN GIANYAR**

PIDAGING

MAKA BANTANG AWIG-AWIG DESA PAKRAMAN PETULU

MURDHA - CITTA

PRATHAMA SARGAH	ARAN LAN WAWIDANGAN DESA
DWITYA SARGAH	PATITIS LAN PAMIKUKUH
TRITYA SARGAH	SUKERTA TATA PAKRAMAN
	Palet 1 Indik Krama
	Palet 2 Indik Prajuru/Dulun Desa
	Palet 3 Indik Kukul
	Palet 4 Indik Paruman
	Palet 5 Indik Druwen Desa
	Palet 6 Sukerta Pamitegep
	Kaping 1 Karang, Tegal lan Carik
	Kaping 2 Pepayonan
	Kaping 3 Wewangunan
	Kaping 4 Wewalungan
	Kaping 5 Bhaya
	Kaping 6 Payanggran Banjar
CATHURTAS SARGAH	SUKERTA TATA AGAMA
	Palet 1 Indik Dewa Yadnya
	Palet 2 Indik Resi Yadnya
	Palet 3 Indik Pitra Yadnya
	Palet 4 Indik Manusa Yadnya
	Palet 5 Indik Bhuta Yadnya
PANCAMA SARGAH	SUKERTA TATA PAWONGAN
	Palet 1 Indik Pawiwahan
	Palet 2 Indik Nyapian
	Palet 3 Indik Sentana
	Palet 4 Indik Warisan
SAT SARGAH	WICARA LAN PAMIDANDA
	Palet 1 Indik Wicara
	Palet 2 Indik Pamidanda
SAPTAMA SARGAH	NGUWAH-NGUWUHIN AWIG-AWIG
ASTHAMA SARGAH	S A M A P T A

MURDHA CITTA

AUM, OM

Om Swastyastu, Om Awighnamastu Nama Sidham.

Malarapan panghyangning Ida Sang Hyang Widhi Wasa, asung kerta
nugraha ngawentenang kahuripan sakala niskala, ring Bhuana Agung lan
Bhuana Alit. Manut dresta desane wantah pawakan pasayuban krama desa
pawuhing kula warga pawongnya, desana kamanggehang Bhuana Agung,
pawongnya sowang-sowang pinaka Bhuana Alit.

Sotaning Bhuana Agung desane wantah pawakan bhawa maurip
langkep saha Tri Hita Karana, luwire:

ha). Parhyangan, sahananing kahyangan, panjiwian desa genah ngarcana Ida
Hyang Parama Wisesa, maka jiwana desane.

na). Pawongan : krama saha warga desa maka sami pawakan bayu Pramana
(Tri Kaya) mawinan desane molah maprawerti.

ca). Palemahan, tanah kakuwuban desa sinanggeh stula sariraning desane.
Adung patemon Bhuana kalih. Larapan santa jagadhita, sinanggeh murdhaning
prayojana panggriptaning awig-awig desa pakraman ring sabha krama Desa
Pakraman Petulu.

Pamutus sabha inucap pinaka sepat siku-siku pamatut, wastu prasida
prayojanan mami kabeh prasama anghidep muwah amagehaken kadi linging
awig-awig iki.

PRATHAMA SARGAH ARAN LAN WEWIDANGAN DESA

Pawos 1

- (1) Desa adat puniki mawasta Desa Pakraman Petulu.
- (2) Jebar kakuwub wawidanganya mawates nyatur :
 - ha. Sisih Wetan ring luah Jasan;
 - na. Sisih Kulon ring luah Tawa;
 - ca. Sisih Lor ring Carik/Subak Suankidul;
 - ra. Sisih Kidul ring Desa Pakraman Peliatan.
- (3) Desa puniki kawangun antuk munjuk lungsuring 139 karang ayahan Desa
lan karang gunakaya kaepah dados 2 (kalih) banjar luwire:

Ha. Banjar Petulu Gunung kawangun antuk 44 karang ayahan desa;
Na. Banjar Petulu Desa kawangun antuk 95 karang ayahan desa.

**DWITYA SARGAH
PATITIS LAN PAMIKUKUH**

Pawos 2

Desa Pakraman Petulu ngamanggehang pamikukuh minakadi :

ha. Pancasila

na. Undang-Undang Dasar 1945 pamekas pasal 18;

ca. Paswara Sang Mawangrat nganinin indik Desa Pakraman.

ra. Tri Hita Karana manut sada cara Agama Hindu.

Pawos 3

Luwir patitis Desa Pakraman Petulu:

Ha. Ngukuhang miwah ngarajegang Sang Hyang Agama.

Na. Nginggilang tata prawetine maagama.

Ca. Ngarajegang kasukertan desa saha pawongannya sakala lan niskala.

**TRITYA SARGAH
SUKERTA TATA PAKRAMAN**

**PALET 1
INDIK KRAMA**

Pawos 4

- (1) Sane kabawos Krama Desa Pakraman Petulu inggih punika kulawarga sane maagama Hindu saha ngamong utawi tan ngamong karang, ring palemahan Desa Pakraman Petulu.
- (2) Siyosan ring punika kasinanggeh Tamiyu sane kabinayang dados kalih inggih punika sane maagama Hindu miwah siyosan ring maagama Hindu.
- (3) Indik tamiyu punika manut pararem.

Pawos 5

Krama desa wenten 4 (petang) pawos luwire:

- ha. Krama pangarep, inggih punika kulawarga sane ngamong karang ayahan desa ;
- na. Krama pangele, inggih punika kulawarga sane nenten ngamong karang turmaning kaundulang antuk krama ngarep;
- ca. Krama Balu manut sakadi aksara ha lan na ring ajeng sane katinggal seda olih lanang utawi istrinyaane utawi sangkaning nyapihan, krama balu inucap kabinayang dados kalih :
 1. Balu makrambian, inggih punika balu sane maduwe sentana dereng marabian utawi dereng antes ngayah;
 2. Balu ngalisting, inggih punika balu sane tanpa sentana.
- ra. Krama tapukan , kulawarga manut aksara ha utawi na ring ajeng sakewanten durung antes ngayah utawi salami kantung masekolah malarapan ilikita pastika saking sekolahnya, manut pararem.

Pawos 6

Ngawitin tedun makrama Desa Pakraman utawi Banjar luwire:

- ha. Sangkaning ngamong karang ayahan Desa;
- na. Mawiwit Pawiwahan ;
- ca. Pinunas ngaraga manut pararem.

Pawos 7

Panamaya tedun makrama Desa Pakraman inggih punika ngawit saking 42 rahina sasampun upacara pawiwahan.

Pawos 8.

Sahanan Krama Desa sami keni tategenan (ayah-ayahan) luwire:

- ha. Ayah pangarep, keni urunan rerampe miwah ayahan mamungkul;
- na. Ayah pangele, keni urunan manut pararem;
- ca. Ayah balu pangarep keni urunan mamungkul sakewanten ayahania manut kahanan balu inucap.

ra. Ayah Tapukan keni urunan mamungkul, kaluputang ayah-ayahan ngantos mayusa 17 warsa utawi sampun mawiwaha. Yaning kanton masekolah taler kaluputang ayah-ayahannya malarapan ilikita pastika pastika saking sekolahnya;

Pawos 9

Swadarman Krama, sewosan ring tategenan, luwire:

ha. Tinut saturut ring sadaging Awig-Awig, pararem lan paswaran Desa;

na. Tan maren ngutsahayang mangda Desane mrasidhayang nyujur manut patitis;

ca. Tinut saturut ring Guru Wisesa.

Pawos 10

Swadharman Tamiyu, luwire:

ha. Tinut saturut ring yasa kertin Desane;

na. Tan piwal ring sadaging Awig-awig, pararem lan paswaran Desa;

ca. Nyadokang raga ring prajuru arahina sasampun jumenek malarapan antuk ilikita pastika saking desane utawi sang ngawawenang;

ra. Yan tan tinut pacang kairid (tan kadadosang jumenek ring Desa).

Pawos 11

Pilih-olihan Krama :

ha. Polih pasayuban sakala niskala tur kabawosin saha katiwakin pamutus sahanan wicaranya;

na. Nyarengin paruman tur wenang sareng mastikayang pamutus;

ca. Kadadosang madeg Prajuru, manut pararem.

Pawos 12

Krama Desa Pakraman kadadosang:

ha. Mapuankid utawi tan tedun rikala sungkan, mayadnya, matepetin sungkan, miwah sane siyosan manut pararem;

na. Nutug ayah antuk artha brana sahantukan kapialang, utawi naub, paetangania manut ring pararem;

ca. Nyuksukin ayah sane kawenang risampun munggah deha taruna utawi mrasidayang nganutin krama;

✓
a. Ngamadengang ayah sasampun mayusa 70 warsa ngalintang utawi sane kabawos sungkan manut pararem, sang ngamademang ayah mangda digelis nyantenang panyeladihi.

Pawos 13

Wusan dados Krama Desa luwire:

a. Sangkaning:

- 1) Pinunas ngaraga, manawi kesah kadura nagara/desa utawi ngalangkungin sagara.
- 2) Kanorayang duaning sampun tan prasida ngesehin solah maprawerti satata nguwug pamargin awig-awig.
- 3) Wusan makrama desa mapiteges taler wusan makrama banjar utawi wusan makrama banjar mapiteges wusan makrama desa mangda sampunang kasinanggeh empak ngalanting.

b. Sang wusan makrama:

- 1) Patut ngaturang karang ayahan ka desa prade karang punika karang desa.
- 2) Tan polih pah pahan saking padruwean desa.
- 3) Tan polih pasayuban sajeroning ala ayu.
- 4) Sang wusan makrama desa/banjar prade mawali malih patut nawur saurah arih tategenan krama manut pararem.

c. Sang wusan sangkaning kanorayang prade mawali malih patut:

- 1) Muntasang saluwir pamidanda utawi tategenan sane ngranayang kanorayang.
- 2) Nunas geng pangampura ring paruman desa maduluran panyangaskara panyasap kaiwangan duwaning nguak pasubaya pecak.
- 3) Sane matilar mawiwit tan becik utawi tan nyadokang ring prajuru mawali malih patut keni tanjek laler makuweh ipun manut pararem.

Palet 2

PRAJURU LAN DULUN DESA (Panglingsir)

Pawos 14

- (1) Desa Pakraman Petulu kaenter olih Bendesa Pakraman.

(2) Banjar kaenter olih Kelian Banjar .

(3) Bendesa lan Kelian Banjar patut:

ha. Mawiwit sakeng krama ngarep/ wedan kajangkepin antuk:

- Uning ring aksara latin utawi bali;
- Uning ring tata titining mawa desa;
- Uning ring pariindiikan agama lan pakraman;
- Lascarya ngayah tur madruwe parilaksana sane rahayu.

(na.) Kaadegang malarapan antuk kacatri olih parumannya soang-soang nyabran 5 (limang) warsa sajawanin wenten pari indik tiyos tur dados kacatri malih.

ca. Maduluran Dewa Saksi ring Pura Bale Agung.

Pawos 15

(1) Bendesa Pakraman kasanggra olih :

ha. Patajuh Bendesa Pakraman pinaka wakilnya.

na. Klian Pakraman wakil Bendesa ring Banjar

ca. Panyarikan pinaka juru surat.

ra. Patengen pinaka juru raksa/pangemong druwen Desa.

ka. Kasinoman pinaka juru arah.

(2) Kasinoman akehnya manut kawigunan saha magilir manut pararem.

(3) Sajeroning ngenterang kasukertan niskala ring kahyangan desa, bendesa mingsingghang pemangku kahyangan Desa utawi sang rumaga Sulinggih.

Pawos 16

(1) Swadamaning Bendesa Pakraman luwire:

ha. Ngenterang pamargin sadaging awig-awig miwah Pararem Desa.

na. Ngenterang krama rauhing warga desa ngupadi manut patitis.

ca. Mawosin kalih niwakang pamutus arep ring wicara warga desa.

ra. Maka duta Desa matemuang bawos ring sapa sira ugi.

(2) Prade Prajuru iwang palaksana keni pamidanda nikel ring kaiwangan soang-soang krama tur dados karayanang manut pararem.

Pawos 17

Patias utawi olih-olihan Prajuru Desa.

ha. luput rerampen;

na. Patias tiyosan manut pararem.

Pawos 18

(1) Prajuru desa kagentosin riantukan:

ha. Seda.

na. Wit sakeng pakayunan utawi pinunas ngaraga.

ca. Duwaning iwang pamargi utawi nilar sesana (kanorayang).

(2) Nganorayang utawi ngentosin Prajuru patut sajeroning paruman tur kaingkupin olih krama desa.

Palet 3

Indik kulkul

Pawos 19

(1) Kulkul ring Desa Pakraman Petulu luwire:

ha. Kulkul ring kahyangan;

na. Kulkul Desa;

ca. Kulkul Banjar;

ra. Kulkul Sekaa-sekaa.

(2) Tabuh tatepakan kulkul ring kahyangan desa:

ha. Nungtit /silih asih tengeran wenten yadnya/upacara;

na. 2 Tulud banban tengeran tedun ngayah/makarya;

ca. bulus tengeran wenten bhaya.

(3) Tabuh tatepakan kulkul ring soang-soang babanjaran :

ha. Bulus :

1) 2 (kalih) tulud bulus tengeran kageni bhaya;

2) 3 (tigang) tulud bulus tengeran kapandangan;

3) 4 (petang) tulud bulus tengeran jiwa bhaya;

4) 3 (tigang) kientungan bulus panjang tengeran lindu, er, lan pawana bhaya.

Na. Lambat :

- 1) 2 (kalih) tulud bamban tengeran tedun ngayah utawi wenten pakaryan;
- 2) Nungtit silih asih tengeran surya grha, bulan kapangan;

Ca. Klentungan :

- 1) 5 (limang) klentungan tengeran rare embas;
- 2) 3 (tigang) klentungan tengeran pawiwahan;
- 3) 9 (sia) klentungan ngempang panjang tengeran ngawangdeang karya;
- 4) 3 (tigang) klentungan bamban tengeran kalayu sekaran.

Pawos 20

- (1) Kukul Desa utawi Banjar tan wenang katepak yaning tan sangkaning pituduh Prajuru Desa /Banjar sajawaning, tengeran bhaya.
- (2) Sang nepak tan sangkaning pituduh patut digelis atur supeksa maka buatan panepake , yan tan sapunika wenang sang mamurug kadanda manut pararem.
- (3) Kukul sekaa-sekaa samaliha kukul pondokan-pondokan tan kalugra nyawerin (matehin) tengeran kukul Desa/Banjar sajawanin tengeran bhaya , prade mamurug taler kadanda manut pararem.

Palet 4

Indik Paruman

Pawos 21

- (1) Paruman /sangkepan ring Desa Pakraman Petulu wenten :

ha. Sangkepan banjar kawentenang:

- 1) Nyabran ngasasih, makacihna tanpa arah-arah duwaning sampun tetep panamaya manut pararem bebanjaran soang-soang.
 - 2) Napkala (padgatakala) maka jalaran antuk arah-arah manut tatujon.
- na. Paruman Prajuru Desa kawentenang manut wigunanya.
- ca. Paruman sekaa sekaa manut tatujon.

(2) Sangkepan/paruman Banjar madudonan sakadi ring sor:

ha. Prasida lumaksana risampun katedunin olih sane patut ngamiletin, kariinin antuk tengeran suaran kulkul saha mabusana adat madya, tur tan kalugra makta gegawan sakaluwire.

na. Tan maren ngarcana ring Ida bhagawan Panyarikan maka sarana widhi widana cane.

ca. Maka sarana janggi, pangawit kalaksanayang panyakcak sep-sepan saha riwusnya nyacak nawur dadosan geng alitnya manut pararem.

ra. Tan kalugra ngawetuang suara goro utawi byota, yan mamurug keni pamidanda beya pacamil kadi dandaning nguman-uman ring sabha.

ka. Pamutus bebawosan bryuk sapanggul (ingkup) punika kamanggehang.

(3) Prade pidaging paruman tan kaingkup mangda prajuru ngutsahayang ngilikang bebaos, suara sane makehan sinanggeh pamutus, pamutusnya mangda kaingkupin olih paruman, bilih tan prasida kasungkemin jantos ping 3 (tiga) prajuru wenang nunas bawos ring sang ngawawenang.

Pawos 22

(1) Sajeronin paruman desa, Bendesa Pakraman patut nyobyahang pamargi ngenterang desa pamekas nganinin indik:

ha. Munjuk lungsuring pakraman saha ayah-ayah sulur arta brana druwen desa.

na. Rarincikan prajuru nganinin usaha desa kapungkur.

(2) Pamutus paruman Desa sinanggeh pararem, maka pamitegep daging awig-awig.

Pawos 23

(1) Sangkepan Prajuru Desa kawenangang wantah ngarincikang pangrencana usaha desa kapungkur.

(2) Sangkepan Prajuru Desa tan kawenangang ngamedalang tategenan ring krama sadereng kaingkupin olih krama Desa ring Paruman.

(3) Pamutus sangkepan Prajuru Desa ngawetuang pasuwara, maka pidaging pituduh sang ngawawenang utawi ngonekang pecak pararem krama desa.

(S)

Palet 5.
INDIK DRUWEN DESA.

Pawos 24

Padruwen Desa Pakraman Petulu sakadi ring sor :

ha. Kahyangan Desa luwire:

- 1) Pura Desa / Bale Agung;
- 2) Pura Puseh ;
- 3) Pura Dalem lan Pura Prajapati;

na. Bale Wantilan Desa, Balai Banjar ring soang-soang banjar/piranti banjar.

ca. Karang ayahan Desa .

(S) ra. Setra 3 (tatiga) makadi setra rare, setra agung muwah setra sudra.

ka. Palaba Pura manut ilikita lan pararem.

da. Lelanguan minakadi gong abarung piranti banjar lan ilen-ilen padruwean Desa.

sa. Lembaga Perkreditan Desa (LPD).

wa. Muah padruwen siosan.

Pawos 25

Piilih olihan Desa Pakraman Petulu luwire:

ha. Piilih olihan sakeng palaba pura.

na. urunan Krama Desa Pakraman.

ca. Paica sakeng guru wisesa.

ra. Paica-paica sane siosan sane patut.

ka. Usaha desa Pakraman.

Pawos 26

(S) (1) Prajuru Desa wenang ngetangang pamupon palaba pura lan sapanunggalan druwen Desa.

(2) Pikolih lan pamuponnya kaanggen prabiya piodalan saha wewangunan ring pura miwah anggen kabuatan Desa Pakraman.

(S) (3) Nyabran pasagkepan desa Prajuru pangamong druwean desa nguningayang pariindik munjuk lungsuring padruwean ring krama Desa.

- (4) Sakaluring druwen Desa patut wenten ilikitannya.
- (5) Tan kalugra ngadol utawi ngesahang padruweyan Desa yan tan kasungkemin olih krama Desa ring paruman.

Palet 6

SUKERTA PAMITEGEP.

Kaping 1

Karang Tegal Lan Carik.

Pawos 27

- (1) Krama Desa Pangemong Karang Desa utawi karang gunakaya patut ngawatesin karang inucap antuk tembok utawi pagehan mangda pakantenannya asri.
- (2) Wates sisi Kaler miwah Kangin patut kawatesin olih sang ngamong karang ayahan inucap, sane mawasta gegaleng kaluan, sajawaning tanah-pacatu, tegal, carik, utawi tanah padruwen ngaraga sane kapiara watese sisi kelod miwah kauh, utawi manut dresta reh punika mawasta gegaleng keteben.
- (3) Prade karasayang pagehan inucap ngalikadin, yan pada arsa panyandinge kengin watese nganggen pinget kewanten kasaksinin olih prajuru desa utawi prahcihna pal saking sang ngawawenang.
- (4) Prade wenten karang kabebeng mangda kausahayang wenten pamarginnya manut paigum lan pararem.
- (5) Karang ayahan Desa sane kasepih tan dados kajangkepeng malih.
- (6) Tan kengin;
 - ha. ngentungang lahu, wangken wewalungan kapakarangan/tegal anak lian kalih kamargine utawi katukade.
 - na. Ngembahang toya wit saking badan wewalungan, kakus, pasiraman, pawaregan, kategal, carik, kamargine utawi katukade miwah sane tiyosan sane ngawinang ambu kawon.
 - ca. Prade wenten sakadi ring ajeng keni pamidanda manut pararem.

Pawos 28

- (1) Sinalih tunggil krama Desa/Banjar tan kalugra :

- (A) ha. Ngalah alah margi, tegal Desa, Karang Desa lan salantur ipun.
(B) na. Ngalah alah tanah tegal, Kahyangan, setra, liyan-liyan malih sakancan
genah sinanggeh suci.

- (2) Prade wenten sakadi ring ajeng, sang ngalalah wenang ngawaliang tanah inucap saha keni pamidanda sapatutnya, tur kadulurin upacara pangelalah tanah suci manut pararem.

Kaping 2 Pepayonan

Pawos 29

- (1) Ngawit nandur pepayonan tanem tuwuh patut adepa agung, (1,5 Meter) ngajeroang sakeng wates, prade jantos ngaliwat wates wenang kasepat gantungin.
- (2) Yening wenten tatanduran ngungkulin samaliha mawastu mayanin kapisaga patut kawara antuk paiguman ping ajeng prasida sang nruwenang wit ngarebah utawi notor/ngenteb.
- (3) Prade sampun kawara taler tan wenten usaha sang nruwenang wit sang rumasa katetahan/ kajorihan wenang masadok ring prajuru Desa tur risampun kaparitas kalugra ngicalang wit inucap, sakewanten patin pepayonan patut katawur manut pangeloika sane nepasin.
- (4) Sang keni pamidanda panyangaskara saha prabiya manut pararem arep ring wewangunan sang karubuhin luwire:
ha. Sang nruwenang wit sinanggeh mayanin, prade pungkut ngarubuhin wewangunan krama tiyos;
na. Sang notor munggul utawi ngarebah taru tur ngarubuhin krama tiyos.
- (5) Prade wenten wit mentik sajeroning wates patut kapademang, mangda tan ngranayang wicara. Prade sampun ageng kapademang, wit punika pinara tiga:
ha. Apah tiga katur ring sang nruwenang wit.
na. Apah tiga katur ring sang panyandingnya.
ca. Apah tiga katur ring Desa Pakraman.
- (6) Krama Desa patut ngamanggehang kawerdian tanem tuwuh sane ngawinang Desane asri.

Kaping 3
Wewangunan

Pawos 30

- (1) Nyabran ngawangun mangda:
 - ha. Masadok ring prajuru Desa, prade wewangunan nganinin wates.
 - na. Ngangge sukat asta bumi miwah gagulak astha kosala kosali sanistane manut ring patitis niskala.
 - ca. Tan nyayubin kapisaga.
- (2) Prade wewangunan ngantos nyayubin bilih-bilih temboke ring tengahing wates risampun kawara tur kasadokang ring dulu, wenang kadanda manut pararem, saha tembok inucap kagubar utawi sanistane mangda kakaryanin abangan.

Kaping 4
Wewalungan

Pawos 31

- (1) Warga desa sane mamiara wewalungan patut sayaga mitenen negul/ ngelogor mangda tan ngarusakin karang utawi paabianan krama sios bilih-bilih jantos ngeranjing ngaletihin kahyangan.
- (2) Prade wenten wewalungan malumbar utawi ngeleb ngarusak oakarangan, paabianan krama siwos, risampun kawara kengin kataban tur kadanda ngawaliang wit sane karusak saha nawur panebas papiaran tetaban manut pararem desa.
- (3) Prade jantos ngaletihin linggih suci minakadi pamrajan, risampun kaparitas olih prajuru Desa wenang sang nruwenang kadanda mabhu agung (caru ekasata maduluran tebasan prayascita, durmanggala) utawi panca sata makerep bebek belang kalung, prade jantos ngaletihin kahyangan tiga utawi pura pemaksan.
- (4) Krama desa patut nyanggra wewalungan miwah sarwa prani, tan kepatutang mademang paksi, nuba ulam miwah sane tiosan prade wenten malaksana sakadi punika keni pamidanda manut pararem tur kaaturang ring sang ngawawenang.

Kaping 5

Bhaya

Pawos 32

- (1) Pari indik bhaya luwire: Jiwa bhaya , arta bhaya, geni bhaya, er bhaya, pawana bhaya pelegandangan lan dura cara ring Agama.
- (2) Sahanan warga desa sane uning ring kawentenane jadma sane ngalaksanayang dusta utawi baya, patut gelis (pramangkin) atur uning ring sang prajuru.
- (3) Bilih mabuat kawentenan sang uning patut digelis nyuarayang kukul manut pangelaksanaan bhaya utawi dustane.
- (4) Prade wenten suaran kukul kadi ring ajeng warga desane patut medal mitulungin sang keni bhaya antuk gegawan manut bhaya.

Pawos 33

- (1) Prade panangkan bhaya utawi dustane puniki mawetu sakeng kaiwangan wong Desa utawi Banjar inucap, wong punika olih prajuru desa utawi banjar patut katiwakin pamidanda manut pararem.
- (2) Prade wenten jadma malaksana mamaling sahananing barang sane wenten ring pura sajaba punika sang ngawen bhaya patut katur ring sang ngawawenang.
- (3) Maweweh panyangaskara sapatutipun, yaning sane kabhaya punika sinanggeh barang suci.

Kaping 6

Panyanggran Banjar.

Pawos 34

Krama Desa rikala ngawentenang karya suka duka, patut kasanggra olih banjar, luwire :

Ha. Prade ngawangun pitra yadnya utawi manusia yadnya, manut pinunas sang mayadnya;

- Na. Pangerombo utawi karya gotong royong krama jantos ping tiga, langkungan ring punika pètut katurang pangu;
Ca. pangu katurang rikala pitra yadnya manut abot dangan yadnya, prade sakeng semengan ngantos wengi katurang pangu ping kalih.

**CATHURTAS SARGAH
SUKERTA TATA AGAMA**

(1) Rina

(2) Nya

**PALET I
INDIK DEWA YADNYA**

Pawos 35

- (1) Kahyangan panyiwian ring wawidangan Desa Pakraman Petulu luwire :

ha. Pura Desa lan Bale Agung;
na. Pura Puseh;
ca. Pura Dalem lan Prajapati;
ra. Pura Masceti;
ka. Pura Agung Basakih;
da. Pura Manca ring soang-soang banjar (melanting);
ta. Pura Subak (dugul);
sa. Pura Pamaksan;
wa. Pamrajan ring soang-soang krama;

- (2) Rahina piodalan soang-soang kahyangan inucap kadi ring sor :

ha. Pura Desa lan Bale Agung rikala Saniscara Kliwon Landep;
na. Pura Puseh rikala rahina Saniscara kliwon Landep;
ca. Pura Dalem lan Prajapati rikala Anggara Kliwon Medangsia;
ra. Pura Masceti rikala Anggara Kliwon Julungwangi;
ka. Pura Agung Besakih rikala Bhuda Wage langkir;
da. Pura Manca ring soang-soang banjar (melanting) manut dresta;
ta. Pura Subak (dugul) rikala Purnama Sasih Kapat;
sa. Pura Pamaksan manut kawentenan utawi dresta soang-soang pamaksan;
wa. Pamrajan ring soang-soang krama manut dresta;
la. Pura Tirtha Tawar rikala Bhuda Wage klawu;

(3) Pangaci ring Pura inucap manut pustaka sastra agama kalaksanayang nista, madya utama manut kawentenang lan pararem.

(4) Pangempon soang-soang pura inucap kaempon manut kawentenang lan dresta.

Pawos 36

(1) Ring soang-soang pura inucap patut kaadegang pamangku.

(2) Ngadegang pamangku manut dudonan:

ha. Katurunan utawi ngawaris;

na. Nyanjan utawi nunas pawisik Widhi;

ca. Kacatri olih Krama Desa .

(3) Tan wenang adegang Pamangku luwire:

ha. Cedangga makadi peceng, perot, cungh lan sapanunggilan ipun ;

na. Sane tan kapatutang manut pararem;

ca. Sakit ila, ayan, buduh wiadin edan;

ra. Sane tan madrebe kasucian urip.

(4) Prabia Kapamangkuan:

ha. Adiksa Widhi (ngawintenin) lanang istri kamedalin saha kalaksanayang olih Sang ngadegang, makadi krama Desa utawi pangempon Pura soang-soang;

na. Mapitra yadnya riwekas punika marupa tategenan krama sane ngadegang.

(5) Pamangku patut ngamanggehang sesananing Pamangku luwire :

ha. Ambek Dharma sadhu;

na. Asewaka Dharma, makadang sastra utama;

ca. Tan parek ring naya dustha;

ra. Tan atayub ring tarub camara yudha;

ka. Tan manjing ring umah wong banija karma;

da. Tan manjing ring umah wong daratikrama;

ta. Tan wenang ajajuden;

sa. Tan anginum asing angawe mada;

wa. Tan pati pikul-pikulan;

la. Tan salah suluh;

na. Pinunas ngaraga, saantukan kageringan lan sapanunggalanya.

ca. Kawusang olih Krama Desa saantukan malaksana sane tiwal ring sesana.

Pawos 40

(3) Kasukertan kahyangan kadi ring sor :

(7) ha. Nenten kalugra ngaranjing ka Pura luwire :

- 1) Sang katiben Cuntaka makadi sebel ring raga utawi kapademan;
- 2) Makta sahanan barang sinanggeh ngaletihin;
- 3) Sato agung sawawaning rikala mapepada;
- 4) mabusana tan patut kadi tata caraning ngaranjing kapura;
- 5) Sadereng polih wak-wakan (pituduh) Prajuru Desa;

na. Pratingkaheng sane tan wenang ring pura luire :

- 1) Masumpah (cor) sawawaning pituduh prajuru Desa;
- 2) Wak parusya/wak capala, Makobetan, masasenengan, makolem lanang istri dados asiki, mabacin, mawarih, macecepin rare, majaljal, majengilan, nyangsang busana, menahin pusungan (santukan punika rikala majejahitan patut magelung busung macingor lidinya);
- 3) Mungguh tedun palinggih sawawanin pituduh prajuru.

ca. Sang mamurug kadi kecap ring ajeng, keni pamidanda pamrayascita sapatutnyane manut pararem.

Pawos 41

(1) Yan wenten jatma karauhan ring Pura/genah suci, sang ngamanggihin patut atur supeksa ring prajuru, I prajuru ngalimbakang ring sajeronin tatimbang manut pararem.

(2) Prade kahyangan kahanan durmanggala, minakadi keni bhaya pamangku utawi sang ngamanggihin patut digelis nyadokang ring prajuru tur I Prajuru mangda marumang krama Desa tur ngawentenang pamrayascita sapatutnya.

Palet 2
INDIK RESI YADNYA

Pawos 42

- (1) Sang pacang madeg pandita/ pinandita, patut masadok ring Prajuru, salantur ipun parindik pamadegannya manut pituduh sang ngawawenang.
- (2) Prajuru Desa patut sareng ngawas nitenin tur wenang ngalangain prade wenten kacihnan nyasar ring kakecap miwah drestane, tur sareng nyaksinin upacaranya saha nyobyahang ring paruman Desa tegap rawuhing wates kawenangannya ngenterang yadnya.
- (3) Krama Desa patut ngaturang ayah sapamadeg miwah ring pangelaspas sang pandita/sulinggih/pinandita lan pamangku riwekas kakuntun olih Prajuru Pakraman.

Pawos 43

- (1) Sang Sulinggih lan pamangku patut ngariyining muputang yadnya ring wawidangan Desa Pakraman Petulu, sasampune wawu kalugra muput Yadnya Kajebar siyos Desa utawi ka Dura Desa.
- (2) Krama Desa sami patut sareng ngawas nitenin katuntun olih Prajuru Pakraman, mangda sahanan yadnya sane kawentenang kaicen pamatut olih sang Pandita/Sulinggih, Pinandita utawi pamangku manut kawenangannya soang-soang.

Palet 3
INDIK PITRA YADNYA

Pawos 44

- (1) Pamargin Pitra Yadnya madudonan manut sakadi ring sor :
 - ha. Pangupakaran Sang Kalayu Sekaran :
 - 1) Antuk mendem utawi ngeseng, makacihna pakingsan ring ibu pratiwi utawi ring geni, salami nuptupang prabeya;
 - 2) Atiwa-tiwa (upakara pangabenan/palebun) manut pararem.
 - na. Upacara-upakara Pitra Yadnya riwusan kaabenang patut kalanturang antuk ngaroras manut dudonan Atma Wedana.

Pawos 45

Swadarmaning lan tategenan prade wenten sinalih tunggil krama kalayu sekaran kadi ring sor:

ha. Sang kaduhkitan patut:

- 1) Nyadokang ring Kelian tur nunas tatimbangan ring kawentenannya;
- 2) Ngaturin banjar mangda ngarombo makarya eteh-ete sawa saha nganter kasetra tur katuran panyambroma canang sasida-sida.

na. Swadamaning Krama Banjar / Pakraman kadi ring sor:

- 1) Kelian Banjar/prajuru maritatas pamargin sang kadukitan manut pararem;
- 2) Nyuarayang kulkul manut dresta;
- 3) Panyanggran banjar salanturnyane :
 - ha) Soang-soang Krama Banjar nedunang patus manut pararem;
 - na) Ngarombo ngaryanin eteh-ete sawa, kasarengin olih krama sane rawuh ngarombo.
 - ca) Sami krama banjar nganter kasetra jantos puput pamendemane.

ra. Tan kalugra nginepang bangbang miwah mendem rikala :

- 1) Semut sadulur;
- 2) Kala gotongan;
- 3) Pasah, was/was panganten;
- 4) Kliwon, kajeng kliwon;
- 5) Soma, Umanis Taulu;
- 6) Ingkel Wong;
- 7) Prawani, Purnama, Tilem;
- 8) Rerahinan Jagat.

ka. Prade wenten kalayu sekaran rikala piodalan, kengin mendem tanpa sadok, tan nyuwarayang kentongan/kulkul tur mamargi wengi/sasiliban.

da. Pamargin pamendeman utawi palebonan mangda nganutin sastra agama lan dresta.

Pawos 46

(1) Sane kasinanggeh kacuntakan sakadi ring sor:

ha. Cuntaka antuk kalayu sekaran.

na. Cuntaka antuk ngraja swala.

- ca. Cuntaka antuk ngembasang putra.
- ra. Cuntaka antuk karuron.
- ka. Cuntaka antuk pawiwahan.
- da. Cuntaka antuk sakit ila, buduh.
- ta. Cuntaka antuk Gamia gamana.
- sa. Cuntaka antuk salah timpal.
- wa. Cuntaka antuk mamitra ngalang.
- la. Cuntaka antuk yening wenten anak istri mobot nenten kaupaka karayang pabiyu kawonan miwah pawidi widana.
- ma. Cuntaka antuk anak istri ngamedalang putra sadurunge kaupacara pabyakala miwah pawidi widana.
- ga. Cuntaka antuk Sad tatayi.

(2) Sengker Cuntaka manut kawentenanya:

- ha. Cuntaka kalayu sekaran, cuntakanya kaanutang ring loka dresta Desa Pakraman Soang-soang;
- na. Cuntaka ngraja swala, 3 rahina ngawit saking ngraja swala utawi salaming ngraja swala;
- ca. Cuntaka ngembasang putra, 42 rahina (abulan pitung rahina) ngawit saking putrane embas, utawi ngantos sampun kaupakarayang makakambuhan lan maprayascitta manut sastra Agama lanang wiadin istri;
- ra. Cuntaka karuron, cuntakanya abulan pitung dina (42 rahina) tur sampun matirta pamrayascita;
- ka. Cuntaka sakit ila, buduh /edan, cuntakanya manut ilikita pastika saking sang ngawawenang/ sang nambanin miwah sampun maprayascita.
- da. Cuntaka Pawiwahan, cuntakanya ngantos sasampune matirta pabiyukawonan.
- ta. Cuntaka Gamia Gamana, cuntakanya ngantos sasampune kapalasang/ kasapihang tur sampun kawentenang pamrayascita raga miwah pamrayascita Desa Pakraman/Kahyangan;
- sa. Cuntaka salah timpal, kapuputang manut ring sastra Agama Hindu;
- wa. Cuntaka anak istri mobot nenten kawentenang upakara pabiukaonan, cuntakanya ngantos kawentenang upakara pabiukaonan;
- la. Cuntaka Mamitra ngalang, cuntakanya ngantos kawentenang upakara pabiukaonan;

- ma. Ngembasang putra nenten kawentenang upakara pabiukaonan miwah pawidiwidana, cuntakanya ngantos wenten sane mameras sang putra lan sampun kawentenang upakara manut ring sastra Agama Hindu;
- ga. Cuntaka Sad Tatayi, cuntakanya ngantos sampun maprayascita raga tur nenten pisan dados ngamungganghang upacara padwijatian.

(3) Cuntaka kalayu sekaran / kapademan:

ha. Kapendem cuntakanya:

1) Cuntaka/sebel kabanjar ngantos 3 rahina riwusnya mendem/ manut drestha utawi sasampun polih pamrayascita.

2) Kulawargania sajeroning pakarangan ngantos 12 rahina/ manut dresta / ngantos masapuh -sapuh;

na. Kaabenang cuntakanya:

Sang nyambut karya Pitra Yadnya cuntakanya ngawit saking nyambut padewasan karya, wusan mapegat kalanturang malih tigang rahina.

(4) Sane katiben cuntaka luire:

ha. Kalayu sekaran sane kacuntaka :

- 1). Sang sane kalayu sekaran;
- 2). Kulawarganya;
- 3). Babanjaran.

na. Ngraja swala sane kacuntaka :

-Sang sane ngrajaswala.

ca. Ngembas putra sane kacuntaka

-Kulawarganya sane ngembasang putra lanang wiadin istri.

ra. Pawiwahan sane kacuntaka :

-Sang sane ngalaksanayang pawiwahan lanang wiadin istri.

ka. Sakit ila, buduh, sane kacuntaka raganya dewek.

da. Karuron sane kacuntaka :

-Kawula warganya lanang wiadin istri.

sa. Gamia gamana sane kacuntaka :

- 1). Sang sane ngalaksanayang gamia gamana.
- 2). Desa pakraman nyane/ Kahyangannyane.

wa. Salah timpal sane kacuntaka :

- 1). Sang sane malaksana salah timpal;
- 2). Kulawarganya.
- 3). Desa Pakraman / Kahyangan.

la. Anak istri mobot nenten kawentenang upacara pabiukaonan sane kacuntaka :

-Sane maraga istri (sane mobot).

ma. Mamitra ngalang sane kacuntaka

-Sane ngalaksanayang mamitra ngalang.

ga. Ngembas putra nenten kawentenang upacara pabiukaonan miwah upacara pawidi-widana sane kacuntaka:

1). Sang sane ngembasang putra.

2). Putra sane embas.

ba. Sad Tatayi sane kacuntaka :

- Sang malaksana Sad Tatayi.

(5) Tan keneng cuntaka luire :

ha. Sang sulinggih lan Pamangku Kahyangan Tiga,

na. Rikala piodalan risampun ngalang sasih/ ngalang tengah.

Pawos 47

(1) Atiwa-tiwa (Pangabenan) kalaksanayang antuk :

ha. Sawa prateka, pangabenan mawatang sawa;

na. Sawa resi, pangabenan mawatang antuk sawa kresyan;

ca. Asti Wedana/suwasta, pangabenan mawatang sawa sane tan kakeniang kagentos antuk lalang utawi toya.

(2) Panamayan pangabenan wenten kalih pawos:

ha. Ngaben dadakan/ bah bangun kadadosang manut pararem;

na. Ngaben ngamasa 3 (tigang) warsa mamargi manut pararem.

(3) Dudonan pangabenan ngawit saking ngagah (seda) ngawangun, ngeseng sawa ngantus pangiriman/nganyut ngantos ngarorasin/nyekah.

Pawos 48

(1) Peputusan atiwa-tiwa/pangabenan wenten kalih pawos :

ha. Ngaben ngamasa peputusan manut pararem.

na. Ngaben dadakan, manut pararem.

(2) Pangingune ring krama Banjar manut pararem.

PALET 4
INDIK MANUSA YADNYA
Pawos 49

- (1) Manusa Yadnya inggih punika, Upacara-upakara dharmaning kahuripan manusa, ngawit saking patemoning kama bang kalawan kama petak ring sajeroning garba , ngantos kalayu sekaran riwekas.
- (2) Upacara ring ajeng madudonan sakadi ring sor :
 - ha. Magedong-gedongan duk pangrempian ibiang.
 - na, Duk sang kamareka medal.
 - ca. Kepus Odel/ kepus puser (kepus pungsed).
 - ra. 12 (roras) rahina.
 - ka. Tutug kambuhan (42 rahina).
 - da. Nigang sasihin utawi nelu bulanan.
 - ta. Pawetuan/otonan/odalan (6 sasih).
 - sa. Mayusa 18 sasih utawi tigang otonan;
 - wa. Mapetik rambut;
 - la. Tutug kelih utawi ngraja swala wadone ngembakin lanange.
 - ma. Matatah utawi mapandes.
 - nga. Pawiwahan (marabian).
 - ba. Pawintenan.
- (3) Upacara-upakara inucap kalaksanayang manut sastra Agama Hindu saha dresta.

PALET 5
INDIK BHUTA YADNYA

Pawos 50

- (1) Bhuta yadnya inggih punika upacara-upakara byakala ring Pratiwi lan Kahyangan sarwa prani saha upacara-upakara ring babuthan miwah ring piranti sewosan.
- (2) Upacara pabyakala ring sarwa prani, sarwa tumuwuh muwang piranti luwire:
 - ha. Ring sarwa lelandep rikala Saniscara Kliwon wara Landep;
 - na. Ring sarwa tumuwuh lan piranti rikala Saniscara Kliwon wara Wariga;
 - ca. Ring sarwa syandana / wahana rikala Saniscara Kliwon wara Kuningan.
 - ra. Ring sarwa lelanguan rikala Saniscara Kliwon wara Krulut;

ka. Ring sarwa ingon-ingon / wewalungan rikala Saniscara Kliwon wara Uye;
da. Ring sarwa ringgit ukir-ukiran rikala Saniscara Kliwon wara Wayang;
ta. Upacara pakala-kalan manusa manut widana, kabawos pabyakala.

(3) Upacara pabyakala ring Pratiwi, Kahyangan lan Babuthan kawastaning macaru.

(4) Pacaruan inucap kamargiang Nista, Madya, Utama manut Wiguna sakadi ring sor:

ha. Eka sata;
na. Panca sata;
ca. Panca sanak;
ra. Resi Gana;
ka. Tawur Agung;
da. Panca Kelud.

(5) Sajawaning kadi ring ajeng kawentenang Upacara :

ha. Masaiban utawi yadnya sesa nyabran wusan ngrateng;
na. Masapuh-sapuh rikala pacang wali ring Pura;
ca. Pacaruan pasasih kalaksanayang nangken Tilem ngawit sasih ka 5, 6, 7, 8, lan ka 9 sajawanin wenten durbiksan jagat.

Pawos 51

(1) Nangken ngawarsa rikalaning nemu Tilem kasanga, kawentenang Tawur Kasanga, kalanturang antuk ngarupuk, maka cihna pacang mapag rahina panyepian benjangne.

(2) Brata panyepian sane patut kamargiang olih Krama Desa Pakraman inggih punika:

ha. Amati Geni : Nenten kengin maapi-api arahina.
na. Amati Karya : Nenten makarya sane mabuat sarahina.
ca. Amati Lelungan : Nenten medal kamargi Agung sarahina.
ra. Amati Lelanguan : Nenten ngawentenang oneng-onengan sarahina.

- (3) Paberatan inucap kamargiang saking semeng ngantos semeng benjangne raris kasuarayang kentongan/ kulkul pinaka cihna sampun ngembak, yening durung wenten suaran kentongan nenten kadadosang ngembak ngaraga, yan mamurug pacang kakenanin pamidanda manut pararem Pakraman.
- (4) Ring ngamargiang brata Panyepian pacang kaenter olih Prajuru desa/ bendesa kasarengin olih pacalang sregep mabusana Pakraman Pacalang .
- (5) Riwus rahina Nyepi (benjangne) maka cihna pangawit Isaka Warsa patut warga Desa sami Madharma Santhi.

**PANCAMA SARGAH
SUKERTA TATA PAWONGAN
PALET 1
INDIK PAWIWAHAN**

Pawos 52

- (1) Pawiwahan inggih punika patemon purusa lan pradana malarapan panunggalan kayun suka lila kadulurin upasaksi sakala-niskala
- (2) Pamargin pawiwahan luwire :
 - ha. Pepadikan, kamanggala antuk pakrunayan.
 - na. Ngarorod, marangkāt riyin wawu kakrunayang.
 - ca. Nyeburin utawi sentana nyeburin (risampun nganutin upakara pamerasan).
- (3) Pidabdab sang pacang mawiwaha patut :
 - ha, Sampun manggeh deha-teruna (prasida nganutin undang-undang);
 - na. Sangkaning pada lila (tan kapaksa);
 - ca. manut kecap sastra Agama (tan gamia gamana);
 - ra. Kasudiwadani prade pangambile tiyos Agama.
- (4) Pamargin pawiwahan mangda taler nganutin Undang-undang Perkawinan sakeng Sang Ngawawenang.

Pawos 53

- (1) Pawiwahan sane kapatutang ring Desa sakadi ring sor :

- ha. Sampun kamargiang pabyakala utawi pasakapan kasaksiang sakalanisakala olih pandita/sulinggih utawi pinandita.
- na. Wenten pasaksi prajuru/ dulu-dulu sane mapakelingang, utawi ngilikitayang pawiwahan.
- ca. Sampun matengeran swaran kulkul.
- ra. Pawiwahan inucap ring ajeng sampun kacatetang ring sang ngawawenang.

(2) Parabian sane tan manut kadi ring ajeng sinanggeh tan patut.

Pawos 54

Tata caraning parabian patut sakadi ring sor :

ha Sapa sira ugi krama pacang ngawarangang pakulawargania patut masadok ring prajuru / dulu-dulu salanturnya prajuru / dulu maritatas manut tan manut pamargin parabianne.

na. Pamargin pepadikan manut dudonan :

1) Pakrunayan jantos ping tiga, saha soang-soang malarapan:

ha. Kapratama antuk canang/sedah;

na. Kaping kalih antuk canang pangrawos;

ca. Kaping tiga antuk tipat bantal kabawos pamuput pepadikan;

2) risampun puput sang istri kaajak budal kapakubon sang lanang saha kalanturang antuk pabyakala.

3) Mangda puput tumus sakala niskala raris kulawarga purusa makta pajati ring pamrajan wadone.

ca. Prade ngarorod/marangkat patut:

1) Reraman lanange ngawentenang pamilaku/pangenduh antuk duta sakirangnya kalih diri.

2) Pagenahan antene tan kengin ring pakubon sang lanang sadereng mabiyakala.

ra. Sajeroning pakrunangan/pangalukuan patut:

1) kamanggala antuk geng pangampura arep ring reraman wadone.

2) Kaigumang bawos indik pakidih utawi palegayan arep ring pasewakan sang ngidih saha dewasa pakerab kambeane riwekas.

3) Kacihnayang indik kapurusa utawi prade sentana rajeg kajejerang kapatut ngidih anak lanang sane kabawos pawiwahan nyeburin tur risampun sulur pamerasan kategepin kamanggehang sentana nyeburin.

4) Prade tan trima pajati pakrunayan kamargiang jantos ping tiga.

Ka. Pakerab kambeyan mapiteges upacara tinas apadang (puput) mapakuren dwaning manut sakadi ring sor:

1) Sajeroning kabawos ambe kalaksanayang ring sakala niskala masrana jejawuman miwah pawidi widana;

Ha) Jejawuman pinaka ngambe/ngadungang kayun soang-soang pakulawargan wadone;

Na) Widi widana pinaka pajati niskala wusan wadone ring pamrajannya.

2) Sajeroning bawos kerab pamargi ring sakala:

Ha) Antuk panyaksi krama banjar duwaning kaparabiang matengeran swaran kulkul;

Na) Pamekas pasaksi Prajuru/dulu dulu sane ngilikitayang.

PALET 2 INDIK NYAPIAN

Pawos 55

- (1) Pawiwahan prasida kawusang malarapan antuk palas parabian utawi kapademan.
- (2) Wusan mapakuren riantukan salah sinunggal seda mapiteges balu, makadi balu lanang / istri.
- (3) Palas parabian inggih punika sangkaning mawiwit wicara.
- (4) Sang ayat palas marabian patut atur supeksa pailikitan riyin ring sang rumawos wastu tinas apadang pamutus kabawos nyapian wawu Prajuru nyobyahang kawentenannya ring Desa saha keni panebas swaran kulkul manut pararem.

Pawos 56

Tata cara palas parabian sakadi ring sor :

ha. Nawur prabeya pasaksi sinalih tunggil sami matenga;

na. Pagunakayan polih pahan pada;

ca. Pabekel tadtadan soang-soang kakuasa niri-niri miwah warisan kakuasa olih purusa.

- ra. Ngaweruhin miwah ngupajiwana pratisentana manut swadarmaning guru rupaka.
- ka. Nawur pamidanda panebasan swaran kulkul manut pararem.
- ka. Ngelung jinah logika Prajuru.
- ka. Mapamit ring Pamrajan lanjange.

Pawos 57

Prade riwekas sang palas kacihnan adung malih patut:

- ha. Ngalaksanayang pawiwahan malih;
- na. Kadanda nikel saking palase;

Pawos 58

(1) Sang balu kabinayang dados;

- ha. Balu luh wit sentana (sentana rajeg) miwah balu luh boya sentana.
- na. Balu muani kapurusa (wit sentana) miwah balu muani nyeburin (boya sentana).

(2) Swadarmaning balu inucap patut :

- ha. Ngemanggehang patibrata tan kengin ngamargiang paradara/darati krama.
- na. Nguasayang waris pagunakaya , tan dados ngadol, ngadeang, makidihang lan siosan punika sawanang kabebasan olih pianak utawi kulawarga pinih tampek sakeng kurenannya prade pianak kantun alit-alit.
- ca. Kengin ngidih sentana prade wenten pidabdab sadurung sinalih tunggil padem saha kabebasan olih kulawarga sakeng kapurusa.
- ra. Kawenangang mawiwaha malih prade wenten kabebasan manut angka/aksara ring ajeng.

Pawos 59

Balu kaucap tan pageh sakadi ring sor:

- ha. Darati krama utawi paradara;
- na. Matilar saking pakubon tan pasadok jantos 6 (enem) sasih;
- ca. Lempas ring swadarma sewos-sewosan, tan prasida ngesehin salah maprawerti arep ring pituduh sane patut sakeng kulawarga purusa.

PALET 3
INDIK SENTANA

Pawos 60

- (1) Sentana wenten kalih pawos, sane kaucap pratisentana miwah sentana papersan.
- (2) Pratisentana inggih punika sentana sane metu sakeng pawiwahan kapatut.
- (3) Prade pawiwahan tan kapatut ngawetuang sentana, mangda tan kantun kawastanin babinjat utawi astra patut kamanggala antuk panyangaskara/paperasan.
- (4) Prade pawiwahan tan kapatut ngawetuang sentana, kengin ngidih sentana antuk upasaksi sakala niskala sane kawastanin sentana paperasan.
- (5) Sentana rajeg inggih punika, pratisentana wadon (pradana) sane kamanggehang lanang (purusa) tur risampun ngalaksanayang pawiwahan kaceburin.
- (6) Sang sane dados kaarsayang sentana rajeg inucap wiwit angka (5) inggih punika :
 - ha. Pratisentana wadon;
 - na. Sampun kamanggehang dados pratisentana lanang (purusa);
 - ca. Pawiwahang kaceburin kautamayang olih jatma sane maagama Hindu utawi jadm sane maagama siyosan sane sampun ngalaksanayang pamarisada raga utawi sudiwadani.
 - ra. Sane ngamanggehang sentana rajeg patut mapasadok ring Prajuru Banjar tur I Klian Banjar patut nyobyahang ring banjar saha ngaturang ring Prajuru desa pakraman.

Pawos 61

- (1) Ngangkat sentana manut dudonan patut makacihna arta brana pamerasan sane kasaksiang sakala-niskala.
- (2) Sapa sira ugi Krama pacang ngidih sentana patut masadok ring Bendesa sanistane 3 (Tigang) sasih sadereng pamerasan. Bendesa ngalanturang pakarsa punika ring sang ngawa wenang.

- (3) Bendesa kawakilin olih klian banjar nyobyahang ring sawidangan desa, sang sapa sira ugi rumasa tan lila mangda nyadokang masengker kalih wuku (14 Rahina) sabanen pamerasan, ring Bendesa Pakraman.
- (4) Prajuru desa digelis mawosin saha ngicenin pamutus nepek ring catur dresta miwah pararem.
- (5) Prade sulur paperasan tan manut kadi kecap ring ajeng, prajuru desa wenang ngandeg sang pacang mameras, saha ngicenin pamutus, mangda kapuputang riyin bebawos sulur utawi wicaranya.
- (6) Wenten ilikita saking sang ngawawenang.

Pawos 62

- (1) Paperasan sane kapatut ring desa risampun makacihna
 - ha. Widhi widana paperasan.
 - na. Kasaksinin olih prajuru Desa sane makelingang utawi ngilikitayang.
 - ca. Kasobyahang ring wawidangan desane.
- (2) Sane kapatut peras angge sentana kadi ring sor :
 - ha. Jatma maagama Hindu,
 - na. Papernahan nedunang saking sang meras.
 - ca. Kulawarga saking purusa, prade tan wenten kengin sakeng wadon yaning taler tan wenten wawu kengin sakama-kama (saking Kayun).
 - ra. Kautamayang saking waris pancer kapurusa.
 - ka. Sinalih tunggil mawiwit saking kulawarga tunggal sanggah utawi mrajan paibon lan dadia utawi ngambilin anak tios sakewanten sang maagama Hindu.
- (3) Kengin ngangkat sentana langkungan ring adiri, lanang wiadin wadon prade ngangkat sentana lanang wadon , nenten dados kapawiwahang.

PALET 4 INDIK WARISAN

Pawos 63

- (1) Warisan inggih punika tetamian arta brana saha ayah-ayahan ngupadi kasukertan sakala-niskala saking kaluhurannya arep ring turunannya.

(2) Kang sinanggeh warisan luwire :

ha. Duwe tengah, makadi tegal, ayahan desa, kahyangan pusaka siwa pakarana lan sapanunggalannya.

na. Pamerajan.

ca. Pagunakaya , tadtadan / dana, hutang piutang.

(3) Wawu kengin kabawos warisan prade wenten :

ha. Sang mapiturun (pawaris).

na. katurunan (ahli waris).

ca. Arta brana miwah tategenan (ayah-ayahan) makacihna warisan.

Pawos 64

(1) Ahli waris luwire:

ha. Pratisentana purusa;

na. Pratisentana pradana (sentana rajeg);

ca. Sentana paperasan lanang/ wadon.

(2) Prade tan wenten sakadi ring ajeng, kang sinanggeh ahli waris

ha. Turunan purusa pernah ngunggahang rerama lanang, pekak salanturipun, rerama misan , mindon.

na. Turunan purusa pernah kasamping makadi kaponakan misan mindon.

Pawos 65

Swadarmaning ahli waris patut :

ha. Nerima saha nguasayang tetamian pahan saking kaluhuranya, makadi ngarempon sanggah, Pura saha pangupakarania miwah nyaladihinin ayah-ayahan pawaris.

na. Ngabenang pawaris saha ngalanturang upacara-upakara pitra.

ca. Nawurin hutang-hutang pawaris sane manut pangeloika.

Pawos 66

Pangepahan waris manut sakadi ring sor :

ha. Risampun kalaksanayang Pitra Yadnya lan hutang-hutang pawaris buntas katawur.

na. Para ahli waris polih pahan pada sangkaning pagunakayan, sajabaning karang/tegal ayahan desa kaemong olih ahli waris kang sinanggeh Krama ngarep utawi krama pangele.

ca. Sinalih tunggil ahli waris kengin tan polih pahan prade :

- 1) Nilar kawitan lan sesananing agama.
- 2) Alpaka guru rupaka.
- 3) Sentana rajeg, kesah mawiwaha utawi pratisentana nyeburin soang-soang kabawos ninggal kadaton.

ra. Boya ahli waris kengin muponin hasil manut dudonan, luwire :

- 1) Sentana luh, salami durung kesah mawiwaha utawi tan alpaca guru, miwah prade madrebe pianak tan kaangkenin olih wong tua rare inucap, kengin ngawaris wantah pikolih pagunakaya sentana luh inucap kemawon.
- 2) Balu luh wiadin muani nyeburin (soang-soang boya sentana).
- 3) Mulih deha utawi teruna, riantukan ring pawiwahan pecak sampun kabawos ninggal kadaton.

Pawos 67

- (1) Prade sajeroning pakulawargan wenten ahli waris langkungan ring adiri patut:
 - ha. Kawentenang paigum indik pedum waris inucap;
 - na. Yan tan prasida katunasang tatimbang ring prajuru desa (Kerta Desa)
 - ca. Prade taler tan wenten cumpu ring panepas Kerta Desa, kengin katumusang ring Sang Rumawos.
- (2) Prade karang inucap kaputungan, patut Prajuru nibakang ring :
 - ha. Sang sinanggah ahli waris;
 - na. Sang kengin anggen sentana;
 - ca. Prade taler tan wenten cumpu ring panepas Kerta Desa, kengin katumusang ring Sang Rumawos.
- (3) Prade jantos karang desa kaepah utawi kasepih, patut soang-soang nedunin makrama desa marep.

SAT SARGAH
WICARA LAN PAMIDANDA

Palet 1
Indik Wicara

Pawos 68

- (1) Sane wenang mawosin makadi mutusang wicara ring Desa inggih punika Prajuru Desa sinanggeh Kerta Desa.
- (2) Tata dudonan mawosin saha muputang wicara warga desa kadi ring sor :
 - ha. Kaping ajeng kabawosin olih Kelian Banjar.
 - na. Tan cumpu ring panepas Kelian Banjar, karerehang pamutus ring paruman banjar.
 - ca. Prade tan cumpu ring pamutus Banjar, katumusang ring Bendesa Pakraman lan Kerta Desa.
 - ra. Taler tan wenten cumpu ring pamutus Bendesa lan Kerta Desa katunasang ring Paruman desa Pakraman.
- (3) Prade sang mawicara tan wenten cumpu ring pamutus paruman desa lan kerta desa, kengin nunasang wicara inucap ring sang rumawos.

Pawos 69

- (1) Sahanan wicara mawiwit kacorahan saka luire sinanggeh nungkasin daging Awig-awig pararem miwah paswara Desa/ banjar , Prajuru patut digelis mawosin tan nyantos pasadok.
- (2) Sajaba wicara kadi ajeng patut nyantosang pasadok sang nunas bawos.
- (3) Panepase patut pastika nyantenang iwang patut malarapan Tri Pramana (saksi, ilikita, bukti) miwah tan maren nepek ring Catur Dresta.

Palet 2
Indik Pamidanda

Pawos 70

- (1) Desa/banjar wenang niwakang pamidanda ring warga desa/banjar sane sisip.
- (2) Paniwak inucap kalaksanayang olih Bendesa / Klijan Banjar.
- (3) Bacakan pamidanda luire:
 - ha. Ayahan punukan kasisipan;
 - na. Danda arta.
 - ca. Kanorayang.
 - ra. Panyangaskara.
- (4) Pamidanda sane katiwakang patut masor singgih manut ring kasisipanne.
- (5) Jinah utawi raja brana pamidanda ngaranjing dados druwen Desa/ Banjar.

Pawos 71

- (1) Krama sane langkungan ring tigang paruman ngalantur tan nawur urunan miwah dadandan wenang karampag.
- (2) Rerampagan ngangge tata cara kadi ring sor :
 - ha. Kalaksanayang olih prajuru kasarengin olih krama saakeha tigang diri maka saksi.
 - na. Sang ngarampag sangkanin darsana ngambil barang utawi nyawenin tanem tumbuh, akehnya manut ring utang sang karampag. Sang karampag mangda lila nyukserahang barangnya sane dados wala.
 - ca. Prajuru miteketang mangda barang-barang sane karampag digelis katebus, masengker awuku (7 rahina) ring kutus rahina pacang kaadol.
 - ra. Tan nganinin saluwir barang sane patut inggilang manut agama miwah tan mademang pangupa jiwa sang karampag.

Pawos 72

- (1) Prade sang pacang karampag ngawara (ngalangin) palaksanaan inucap mawastu sampun tan nganutin awig-awig desa wenang karang desa sane kagenahin kadaut olih krama Desane.

- (2) Samaliha yan purun taler ngalangin palaksanaan kadi ring ajeng tan wenten pamargi sajawaning kasepekang olih krama desane.
- (3) Pamidanda inucap ring ajeng keni buntas risampun sang kakeninin :
 - ha. Nunas geng rena pangampura ring krama desa riantukan nguwak pasubaya (pararem) pecak.
 - na. Nawur pangangan panguwak pasubayane duk pacang karampag kadulurin pamrayascita panyapsap kaiwangane ring desa.

SAPTAMA SARGAH
Nguwah-Nguwuhin Awig-awig

Pawos 73

- (1) Nguwah-nguwuhin awig-awig desa puniki kalaksanayang ring paruman desa.
- (2) Awig-awig puniki kamargiang ngawit kaingkupin (kararemin)

Pawos 74

- (1) Sakaluwiring sane wenten saderengnya patut kaanutang ring sadaging awig-awig puniki.
- (2) Sakaluwiring sane durung kabawos sajeroning awig-awig puniki patut kalaksanayang manut tata cara sane sampun mamargi kadulurin antuk pararem-pararem.

ASTAMA SARGAH
SAMAPTA

Pawos 75

- (1) Awig-awig puniki kararemin olih krama Desa Pakraman Petulu duk rahina Sukra Kliwon, Uku Bala, Sasih Karo, Isaka Warsa 1909 tanggal masehi 21 Agustus 1987.
- (2) Awig-awig puniki kalingga tanganin olih Bendesa Pakraman lan Prajuru Pakraman. Kasarengin Kelian-kelian Banjar, saha kasaksiang olih Prajuru Dinas pinaka saksi.

6.2 (S)

(3) Luwir sang ngalingga tanganin :
ha. Kaprathama Prajuru Desa :

1. Bendesa Pakraman

ttd

Cokorda Raka Sukawati

2. Klian Banjar Pakraman Petulu Desa

ttd

Anak Agung Alit

3. Klian Banjar Pakraman Petulu

ttd

I Wayan Becol

4. Perbekel Desa Petulu

ttd

I Wayan Beneh

5. Camat Ubud

ttd

I Gede Kaler, BA.

(4) Kaparipurnayang malih duk rahina Sukra Kliwon Wara Bala, Panglong ping 9 sasih Kasa isaka 1924 tanggal masehi 2 Agustus 2002 ring wantilan Desa Pakraman Petulu;

(5) Awig-awig puniki kalingga tanganin olih Prajuru desa Pakraman kasarengin klian-klian banjar kasaksinin prajuru Dinas pinaka saksi :

(6) Luwir sang ngalingga tanganin :
Ha. Prajuru Pakraman ,

1. Bendesa Pakraman Petulu



I Wayan Beneh

2. Panyarikan



I Made Denes

3. Klian Banjar Petulu Gunung

Nyoman Klinced

4. Kepala Klian Banjar Petulu Desa

Made Suyadnya

Na. Kaping kalih prajuru dinas pinaka saksi:

1. Kepala Dusun Petulu Gunung


Nyoman Klinced

2. Kepala Dusun Petulu Desa

Made Suyadnya


3. Kepala Desa Petulu

A. A. Gd. Oka Wiyadnyana

4. Camat Ubud

Drs Ida Bagus Ngurah Gede

Mengetahui dan telah dicatatkan

Kada tanggal : 27 Januari 2003
Nomor : 7 Tahun 2003


KABUPATEN GIANYAR
ISKORNA GDE BUDI SURYAWAN, SH